

LLYFR

# GENESIS

## Hanes y Creu

**1** Yn y dechreuad creodd Duw y nefoedd a'r ddaear. <sup>2</sup>Yr oedd y ddaear yn afluniaidd a gwag, ac yr oedd tywyllwch ar wyneb y dyfnder, ac ysbryd Duw<sup>3</sup> yn ymsymud ar wyneb y dyfroedd. <sup>3</sup>A dywedodd Duw, "Bydded goleuni." A bu goleuni. <sup>4</sup>Gwelodd Duw fod y goleuni yn dda; a gwahanodd Duw y goleuni oddi wrth y tywyllwch. <sup>5</sup>Galwodd Duw y goleuni yn ddydd a'r tywyllwch yn nos. A bu hwyr a bu bore, y dydd cyntaf.

<sup>6</sup>Yna dywedodd Duw, "Bydded ffurfafen yng nghanol y dyfroedd yn gwahanu dyfroedd oddi wrth ddyfroedd." <sup>7</sup>A gwnaeth Duw y ffurfafen, a gwahanodd y dyfroedd o dani oddi wrth y dyfroedd uwchlaw iddi. A bu felly. <sup>8</sup>Galwodd Duw y ffurfafen yn nefoedd. A bu hwyr a bu bore, yr ail ddydd.

<sup>9</sup>Yna dywedodd Duw, "Casgler yng-hyd y dyfroedd dan y nefoedd i un lle, ac ymddangosod tir sych." A bu felly. <sup>10</sup>Galwodd Duw y tir sych yn ddaear, a chronfa'r dyfroedd yn foroedd. A gwelodd Duw fod hyn yn dda. <sup>11</sup>Dywedodd Duw, "Dyged y ddaear dyfiant, llyisiau yn dwyn had, a choed i'r ar y ddaear yn dwyn ffrwyth a had ynddo, yn ôl eu rhywogaeth." A bu felly. <sup>12</sup>Dygodd y ddaear dyfiant, llyisiau yn dwyn had yn ôl eu rhywogaeth, a choed yn dwyn ffrwyth a had ynddo, yn ôl eu rhywogaeth. A gwelodd Duw fod hyn yn dda. <sup>13</sup>A bu hwyr a bu bore, y trydydd dydd.

<sup>14</sup>Yna dywedodd Duw, "Bydded goleuadau yn ffurfafen y nefoedd i wahanu'r dydd oddi wrth y nos, ac i fod yn arwyddion i'r tymhorau, a hefyd i'r dyddiau a'r blynnyddoedd. <sup>15</sup>Bydded iddynt fod yn oleuadau yn ffurfafen y nefoedd i oleuo ar y ddaear." A bu felly. <sup>16</sup>Gwnaeth Duw y ddau olau mawr, y golau mwyaf i reoli'r dydd, a'r golau lleiaf y nos; a gwnaeth y sêr hefyd. <sup>17</sup>A gosod-

odd Duw hwy yn ffurfafen y nefoedd i oleuo ar y ddaear, <sup>18</sup>i reoli'r dydd a'r nos ac i wahanu'r goleuni oddi wrth y tywyllwch. A gwelodd Duw fod hyn yn dda. <sup>19</sup>A bu hwyr a bu bore, y pedwerydd dydd.

<sup>20</sup>Yna dywedodd Duw, "Heigied y dyfroedd o greaduriaid byw, ac uwchlaw'r ddaear eheded adar ar draws ffurfafen y nefoedd." <sup>21</sup>A chreodd Duw y morfilod mawr, a'r holl greaduriaid byw sy'n heigio yn y dyfroedd yn ôl eu rhywogaeth, a phob aderyn asgellog yn ôl ei rywogaeth. A gwelodd Duw fod hyn yn dda. <sup>22</sup>Bendithiodd Duw hwy a dweud, "Byddwch ffrwythlon ac amlhewch a llanwch ddyfroedd y moroedd, a lluosoged yr adar ar y ddaear." <sup>23</sup>A bu hwyr a bu bore, y pumed dydd.

<sup>24</sup>Yna dywedodd Duw, "Dyged y ddaear greaduriaid byw yn ôl eu rhywogaeth: anifeiliaid, ymlusgiaid a bwystfilod gwyllt yn ôl eu rhywogaeth." A bu felly. <sup>25</sup>Gwnaeth Duw y bwystfilod gwyllt yn ôl eu rhywogaeth, a'r anifeiliaid yn ôl eu rhywogaeth, a holl ymlusgiaid y tir yn ôl eu rhywogaeth. A gwelodd Duw fod hyn yn dda.

<sup>26</sup>Dywedodd Duw, "Gwnawn ddyn ar ein delw, yn ôl ein llun ni, i lywodraethu ar bysgod y môr, ar adar yr awyr, ar yr anifeiliaid gwyllt, ar yr holl ddaear, ac ar bopeth sy'n ymlusgo ar y ddaear."

<sup>27</sup>Felly creodd Duw ddyn ar ei ddwlw ei hun; ar ddwlw Duw y creodd ef; yn yryw ac yn fenyw y creodd hwy. <sup>28</sup>Bendithiodd Duw hwy a dweud, "Byddwch ffrwythlon ac amlhewch, llanwch y ddaear a darostyngwch hi; llywodraethwch ar bysgod y môr, ar adar yr awyr, ac ar bopeth byw sy'n ymlusgo ar y ddaear."

<sup>29</sup>A dywedodd Duw, "Yr wyf yn rhoi i chwi bob llysieuyn sy'n dwyn had ar wyneb y ddaear, a phob coeden â had yn ei ffrwyth; byddant yn fwyd i chwi. <sup>30</sup>Ac i bob bwystfil gwyllt, i holl adar yr awyr, ac i bopeth sy'n ymlusgo ar y ddaear,

<sup>a</sup>Neu, a gwynt nerthol.

popeth ag anadl einioes ynddo, bydd pob llysieuyn glas yn fwyd.” A bu felly.  
<sup>31</sup>Gwelodd Duw y cwbl a wnaeth, ac yr oedd yn dda iawn. A bu hwyr a bu bore, y chweched dydd.

**2** Felly gorffennwyd y nefoedd a'r ddaear a'u holl luoedd. <sup>2</sup>Ac erbyn y seithfed dydd yr oedd Duw wedi gorffen y gwaith a wnaeth, a gorffwysodd ar y seithfed dydd oddi wrth ei holl waith.  
<sup>3</sup>Am hynny bendithiodd Duw y seithfed dydd a'i sancteiddio, am mai ar hwnnw y gorffwysodd Duw oddi wrth ei holl waith yn creu.

4 Dyna hanes cenhedlu'r nefoedd a'r ddaear pan grewyd hwy.

### Gardd Eden

Yn y dydd y gwnaeth yr ARGLWYDD Dduw ddaear a nefoedd, <sup>5</sup>nid oedd un o blanhigion y maes wedi dod ar y tir, nac un o lysiau'r maes wedi blaguro, am nad oedd yr ARGLWYDD Dduw eto wedi peri iddi lawio ar y ddaear, ac nad oedd yno ddyn i drin y tir; <sup>6</sup>ond yr oedd tarth yn esgyn o'r ddaear ac yn dyfrhau holl wyneb y tir. <sup>7</sup>Yna lluniodd yr ARGLWYDD Dduw ddyn o lwch y tir, ac anadlodd yn ei ffroenau anadl einioes; a daeth y dyn yn greadur byw. <sup>8</sup>A phlannodd yr ARGLWYDD Dduw ardd yn Eden, tua'r dwyrain; a gosododd yno y dyn yr oedd wedi ei lunio. <sup>9</sup>A gwnaeth yr ARGLWYDD Dduw i bob coeden ddymunol i'r golwg, a da i fwyta ohoni, dyfu o'r tir; ac yr oedd pren y bywyd yng nghanol yr ardd, a phren gwybodaeth da a drwg.

10 Yr oedd afon yn llifo allan o Eden i ddyfrhau'r ardd, ac oddi yno yr oedd yn ymrannu'n bedair. <sup>11</sup>Enw'r afon gyntaf yw Pison; hon sy'n amgylchu holl wlad Hafila, lle y ceir aur; <sup>12</sup>y mae aur y wlad honno'n dda, ac yno ceir bdeliwm a'r maen onyx. <sup>13</sup>Enw'r ail yw Gihon; hon sy'n amgylchu holl wlad Ethiopia. <sup>14</sup>Ac enw'r drydedd yw Hidecel; hon sy'n llifo o'r tu dwyrain i Asyria. A'r bedwaredd afon yw Ewfrates.

15 Cymerodd yr ARGLWYDD Dduw y dyn a'i osod yng ngardd Eden, i'w thrin a'i chadw. <sup>16</sup>Rhoddodd yr ARGLWYDD Dduw orchymyn i'r dyn, a dweud, “Cei fwyta'n rhydd o bob coeden yn yr ardd, <sup>17</sup>ond ni chei fwyta o bren gwybodaeth da

a drwg, oherwydd y dydd y bwytei ohono ef, byddi'n sicr o farw.”

18 Dywedodd yr ARGLWYDD Dduw hefyd, “Nid da bod y dyn ar ei ben ei hun; gwnaf iddo ymgeledd cymwys.”  
<sup>19</sup>Felly fe luniodd yr ARGLWYDD Dduw o'r ddaear yr holl fwystfilod gwyllt a holl adar yr awyr, a daeth â hwy at y dyn i weld pa enw a roddai arnynt; a pha enw bynnag a roes y dyn ar unrhyw greadur, dyna fu ei enw. <sup>20</sup>Rhoes y dyn enw ar yr holl anifeiliaid, ar adar yr awyr, ac ar yr holl fwystfilod gwyllt; ond ni chafodd ymgeledd cymwys iddo'i hun. <sup>21</sup>Yna parodd yr ARGLWYDD Dduw i drwmgwsg syrthio ar y dyn, a thra oedd yn cysgu, cymerodd un o'i asennau a chau ei lle â chnawd; <sup>22</sup>ac o'r asen a gymerodd gwnaeth yr ARGLWYDD Dduw wraig, a daeth â hi at y dyn. <sup>23</sup>A dywedodd y dyn,

“Dyma hi!

Asgwrn o'm hesgyrn, a chnawd o'm cnawd.

Gelwir hi yn wraig, am mai o ŵr<sup>b</sup> y cymerwyd hi.”

<sup>24</sup>Dyna pam y bydd dyn yn gadael ei dad a'i fam, ac yn glynu wrth ei wraig, a byddant yn un cnawd. <sup>25</sup>Yr oedd y dyn a'i wraig ill dau yn noeth, ac nid oedd arnynt gywilydd.

### Anufudd-dod Dyn

**3** Yr oedd y sarff yn fwy cyfrwys na'r holl fwystfilod gwyllt a wnaed gan yr ARGLWYDD Dduw. A dywedodd wrth y wraig, “A yw Duw yn wir wedi dweud, ‘Ni chewch fwyta o'r un o goed yr ardd?’” <sup>2</sup>Dywedodd y wraig wrth y sarff, “Cawn fwyta o ffrwyth coed yr ardd, <sup>3</sup>ond am ffrwyth y goeden sydd yng nghanol yr ardd dywedodd Duw, ‘Peidiwch â bwyta ohono, na chyffwrdd ag ef, rhag ichwi farw.’” <sup>4</sup>Onid dywedodd y sarff wrth y wraig, “Na! ni fyddwch farw; <sup>5</sup>ond fe ŵyr Duw yr agorir eich llygaid y dydd y bywtewch ohono, a byddwch fel Duw<sup>c</sup> yn gwybod da a drwg.” <sup>6</sup>A phan ddeallodd y wraig fod y pren yn dda i fwyta ohono, a'i fod yn deg i'r golwg ac yn bren i'w ddymunio i beri doethineb, cymerodd o'i ffrwyth a'i fwyta, a'i roi hefyd i'w gŵr, a bwytaodd yntau. <sup>7</sup>Yna agorwyd eu llygaid hwy ill dau i wybod eu bod yn noeth, a gwniasant ddail ffygys-bren i wneud ffedogau iddynt eu hunain.

<sup>b</sup>Yr Hebraeg yn chwarae ar y geiriau 'issa (gwraig) a 'is (gŵr).

<sup>c</sup>Neu, duwiau.

8 A chlywsant sŵn yr ARGLWYDD Dduw yn rhodio yn yr ardd gyda hwyr y dydd, ac ymguddiodd y dyn a'i wraig o olwg yr ARGLWYDD Dduw ymysg coed y ardd. <sup>9</sup>Ond galwodd yr ARGLWYDD Dduw ar y dyn, a dweud wrtho, "Ble'r wyt ti?" <sup>10</sup>Atebodd yntau, "Clywais dy sŵn yn yr ardd, ac ofnais oherwydd fy mod yn noeth, ac ymguddiais." <sup>11</sup>Dywedodd yntau, "Pwy a ddywedodd wrthyti dy fod yn noeth? A wyt ti wedi bwyta o'r pren y gorchymynais iti beidio â bwyta ohono?" <sup>12</sup>A dywedodd y dyn, "Y wraig a rodداist i fod gyda mi a roes i mi o ffrwyth y pren, a bwyteais innau." <sup>13</sup>Yna dywedodd yr ARGLWYDD Dduw wrth y wraig, "Pam y gwnaethost hyn?" A dywedodd y wraig, "Y sarff a'm twyllodd, a bwyteais innau."

### Dedfryd Duw

14 Yna dywedodd yr ARGLWYDD Dduw wrth y sarff:

"Am iti wneud hyn, yr wyt yn fwy  
melltigedig  
na'r holl anifeiliaid,  
ac na'r holl fwystfilod gwyllt;  
byddi'n ymlusgo ar dy dor,  
ac yn bwyta llwch holl ddyddiau dy  
fywyd.

<sup>15</sup>Gosodaf elyniaeth hefyd rhyngot ti a'r  
wraig,  
a rhwng dy had di a'i had hithau;  
bydd ef yn ysigo dy ben di,  
a thithau'n ysigo'i sawdl ef."

<sup>16</sup>Dywedodd wrth y wraig:  
"Byddaf yn amlhau yn ddirfawr dy  
boen a'th wewyr;  
mewn poen y byddi'n geni plant.  
Eto bydd dy ddyhead am dy ŵr,  
a bydd ef yn llywodraethu arnat."

<sup>17</sup>Dywedodd wrth Adda:  
"Am iti wrando ar lais dy wraig,  
a bwyta o'r pren y gorchymynais i ti  
beidio â bwyta ohono,  
melltigedig yw'r ddaear o'th achos;  
trwy lafur y bwyte'i ohoni holl  
ddyddiau dy fywyd.

<sup>18</sup>Bydd yn rhoi iti ddrain ac ysgall, a  
byddi'n bwyta llysiau gwyllt.

<sup>19</sup>Trwy chwydys dy wyneb y byddi'n bwyta  
bara  
hyd oni ddychweli i'r pridd,  
oherwydd ohono y'th gymerwyd;  
llwch wyt ti, ac i'r llwch y dychweli."

<sup>20</sup>Rhoddodd y dyn i'w wraig yr enw Efa,

am mai hi oedd mam pob un byw. <sup>21</sup>A gwnaeth yr ARGLWYDD Dduw beisiau crwyn i Adda a'i wraig, a'u gwisgo amdanynt.

22 Yna dywedodd yr ARGLWYDD Dduw, "Y mae'r dyn fel un ohonom ni, yn gwybod da a drwg. Yn awr, rhaid iddo beidio ag estyn ei law a chymryd hefyd o bren y bywyd, a bwyta, a byw hyd byth."

<sup>23</sup>Am hynny anfonodd yr ARGLWYDD Dduw ef allan o ardd Eden, i drin y tir y cymerwyd ef ohono. <sup>24</sup>Gyrrodd y dyn allan; a gosododd gerwbiaid i'r dwyrain o ardd Eden, a chleddyf fflamlyd yn chwyrlio, i warchod y ffordd at bren y bywyd.

Y BEIBL YN GYMRAEG  
(THE BIBLE IN WELSH)

© BFBS 1988

<sup>ch</sup>Hebraeg, *canah*. Cymh. *Cain*.

<sup>d</sup>Felly Fersiynau. Hebraeg heb " *Gad ... maes*."